

## **Arfattat angisuut pissatallu nalunaarutigineqartarnerat pillugu Namminersornerullutik Oqartussat nalunaarutaat nr. 10, 17. april 2009-meersoq Atuussimasoq (Historisk)**

Piniarneq aallaaniarnerlu pillugit Inatsisartut inatsisaanni nr. 12-imi 29. oktober 1999-imeersumi kingusinnerusukkut inatsisartut inatsisaatigut nr. 1 16. maj 2008-meersukkut allanngortinneqartumi § 2, imm. 4, §§ 12, 13 aamma § 17 naapertorlugit aalajangersarneqarpoq:

§ 1. Tikaagullimmik arfermilluunniit tikaagullimmit anginerusumik pisaqartoq pissaasorluunniit tamatuminnga piaartumik kommuniminut nalunaaruteqassaaq. Ataatsimoorluni piniarnermi toqqagaalluni aquttoq nalunaaruteqassaaq.

Imm. 2. Kitaani tikaagulliit pisat pissatallu tamarmik kommunimut pisassiissutinit ilanngaataassapput ukiumi pineqartumi imaluunniit ukiumi tullermi. Tunumili pisat kisimik ilanngaataassapput.

Imm. 3. Immersuiffissaq akuerisaq (ilanngussaq 1) atorlugu kommunip allaffianut kommunilluunniit nunaqarfimmi allaffianut qaninnerpaamut nalunaaruteqartoqartassaaq, tassanngaaniillu piaartumik nalunaarut pisaqartup kommunianut ingerlateqqinneqassaaq.

### Arfanneq

§ 2. Arferit § 1-imi taaneqartut pisaqartuqareeraangata immersugassami makku nalunaarutigineqartassapput:

1) arfermut tunngatillugu (immersugassami B-E):

a) Suunera.

b) Takissusia, kakkiviaata nuuniit sarpiisa kiggaannut uuttorlugu.

c) Suiaanera.

d) Arnaviaappat: immoqarnersoq, illaaqarnersoq, taamaassimappallu illaava qanoq takitiginersaq suiaanersorlu.

e) Sunik aqajarormioqarnersoq.

2) piniarnermut tunngatillugu (immersugassami A, F, G, H, I aamma J):

a) Angallatip aqqa GR-normualu, ataatsimoorluni piniarnermi; angallatit aqqi GR-normuulu imaluunniit angallateqqat qassiunersut.

b) Piniartup aqqa, inuttut normua, ataatsimoorluni piniarnermi piniaqataasut aqqi inuttullu normui, allaffissiap tunuanut allanneqassapput.

c) Pisaqarnissamat kommunip akuersissutaata normua tikaagullimmut.

d) Pisaqarfiup sumiinnera, allorniusat sanimukaartut ammukaartullu imaluunniit feltkode (sumiiffik immikkut ilisarnaasigaq), Kalaallit Nunaanni Aalisarnermik Avatangiisinillu Misissuisoqarfiup feltkodinut tunngatillugu assiliaa naapertorlugu, atorlugu. Imaluunniit allatut paatsuugassaannngitsumik

nalunaarutigalugu.

e) Ulloq pisaqarfik.

f) Pilaffik.

g) Pisap oqimaassusaa missingerlugu; kilogram mattak, orsoq kiisalu neqi. Kiisalu misissugassamik peersisoqarsimanersoq Pinngortitaleriffimmullu nassiullugu.

h) Sakku arfannermi atorneqartoq, nalunaarutigalugu sakku imalunniit sakkup paatussusia sorleq atorneqarsimanersoq. Qamutilimmik sakkoqarsimagaanni tuukkaq qaartartoqarsimanersoq nalunaarutigineqassaaq. Tuukkaq qaartartullip serienormua tassunga kigartorneqarsimasoq nalunaarutigineqassaaq.

i) Arfeq qanoq sivistigisumik toqujartorsimanersoq nalunaarutigineqassaaq, tassa eqqortinneraniit toqunissaa tikillugu. Aammattaaq Ilangussami I-imi qupp. 2-mi titartakkami nalunaaqutserneqassaaq arfeq sukkut eqqorneqarsimanersoq. Minutsit 30-it sinnerlugit toqusaasoqarsimappat tamanna nassuiaatigineqassaaq.

3) immersuisup aqqa ullorlu immersuiffik. (immersugassami L).

### Pissaanermi

§ 3. Arferit § 1-imi taaneqarsimasut pissanneqarsimappata tulaanneqaratik makku nalunaarutigineqassapput (immersugassami A, B, F, I, K & L):

1) Arfeq suusimanersoq.

2) Angallatip aqqa GR-normualu, ataatsimoorluni piniarnermi piniqataasut aqqi inuttullu normui; pujortuleeqqat aqqi GR-normuilu imaluunniit angallateeqqat qassiuneri.

3) Piniartup aqqa, ataatsimoorluni piniarnermi peqataasut aqqi inuttullu normui immersugassap tunuani.

4) Pisaqarnissamat kommunip akuersissutaata normua tikaagullimmut,

5) Arfeq sumi pissanneqarsimanersoq, allorniusat sanimukaartut ammukaartullu imaluunniit feltkode (sumiiffik immikkut ilisarnaasigaq), Kalaallit Nunaanni Aalisarnermik Avatangiisinillu

Misissuisoqarfiup feltkodinut tunngatillugu assiutaa naapertorlugit imaluunniit sumiiffia allatut ililluni paatsuugassaaajunnaarlugu nalunaarutigalugu.

6) Ulloq pissaaffik.

7) Pissaanermi sakkut atukkat. Qamutilimmik sakkoqarsimagaanni tuukkaq qaartartoqarsimanersoq nalunaarutigineqassaaq. Tuukkaq qaartartullip serienormua tassunga kigartorneqarsimasoq nalunaarutigineqassaaq.

8) pissaasimanermi peqqutaasut suunersut; soorlu assersuutigalugu silap ajornera, atortunik ajutoorneq il.il. Aammattaaq Ilangussaq I, qupp. 2-mi titartakkami nalunaaqutserneqassaaq arfeq sukkut eqqortissimanersoq.

9) Immersuisup aqqa ullorlu immersuiffik.

§ 4. Kommunalbestyrelsi pisussaavoq qularnaallillugu uppernarsineqarpat arfermik unioqqutitsilluni pisaqartoqarsimasoq imlt. pissaasoqarsimasoq tamatuma mailikkut imlt. oqarasuaatikkut kiisalu immersugassaq atorlugu nalunaarutiginiisaanut. Nalunaarut tuaviortumik mailikkut imlt. faxikkut Aalisarnermut, Piniarnermut Nunalerinermullu Aqutsisoqarfimmut nassiunneqartassaaq.

Imm. 2. Naalackersuisut kommunalbestyrelsi piumaffigisinnaavaat akuersissutit tunniunneqarsimasut atorunnarseqqullugit kommunalbestyrelsi paasisutissanik piffissaq eqqorlugu Naalackersuisunut nassitsisarsimangippat imaluunniit paasisutissanik amigartunik nassitsisarsimappat.

§ 5. §§ 1, 2, aamma 3-mik unioqqutitsisoq akiliisitaasinnaavoq.

§ 6. Nalunaarut atortuulissaaq aprilip 17. april 2009-meersoq.

Imm. 2. Tamatumunnga peqatigitillugu arfattat pissatallu nalunaarutigineqartarnerat pillugu nalunaarut nr. 13. 3. april 1998-imeersoq atorunnaarpoq

*Namminersornerullutik Oqartussat, 17. april 2009-meersoq.*

Finn Karlsen

/

Amalie Jessen

---

Ilanngussaq